



Pouke i poruke hadža (Meka)

Hatib: dr. Bender ibn Abdulaziz Belile

12. zulhidže 1447. po Hidžri / 29. maj 2026.

Hvala Allahu Koji je hadžijama olakšao obavljanje hadža. Njega, Uzvišenog, hvalimo i Njemu se zahvaljujemo. Obuhvatio ih je Svojom milošću i preuzeo brigu o njima. Svjedočim da nema boga osim Allaha, Jedinog, Koji nema sudruga, Koji je umnogostručio njihove nagrade i uslišao njihove dove, i svjedočim i da je naš vjerovjesnik Muhammed, sallallahu alejhi ve sellem, Njegov rob i poslanik, koji ih je uputio na ono u čemu je njihova dobrobit i spas. Neka su Allahova milost, blagoslov i spas na njega, njegovu porodicu i ashabe, koji su na Allahovom putu nesebično žrtvovali svoj imetak i svoje vrijeme.

O ljudi, i sebi i vama preporučujem bogobožnost. Bojte se Allaha, Allah vam se smilovao, obožavajte Ga i zahvaljujte Mu na Njegovim blagodatima, jer ćete se Njemu vratiti. Znajte da je ibadet putovanje koje traje cijeli život i hod srca koji ne prestaje sve dok čovjeku ne dođe njegov određen čas. Uzvišeni Allah kaže: "I sve dok si živ, Gospodaru svome se klanjaj." (El-Hidžr, 99)

O muslimani, hodočasnici Allahove časne Kuće!

Hadžski obredi približavaju se kraju, a mnogi se već pripremaju za povratak svojim domovima, nakon što su prolili suze i uputili dove svome Gospodaru na tim časnim i odabranim mjestima. Blago onima koji su iskoristili ove vrijedne trenutke boravka u blagoslovljenoj zemlji, ispunjavajući ih tekbirom, tehlilom, zikrom i dovom.

Zahvaljujte Allahu što vam je omogućio da svoje obrede obavite na najljepši i najpotpuniji način. On vas je odabrao, počastio i odlikovao nad mnogim Svojim stvorenjima. Koliko je samo onih koji žarko čeznu za ovim putovanjem, a nije im bilo određeno da njihove noge kroče ovim časnim predjelima! I koliko je nemarnih i uskraćenih koje je Allah, iz Svoje mudrosti i volje, spriječio da stignu do ovih svetih





mjesta! Uzvišeni kaže: "...ali Allahu nije bilo po volji da idu, pa ih je zadržao, i bî im rečeno: 'Sjedite sa onima koji sjede!'" (Et-Tevba, 46)

O muslimani, hadž je riznica pouka i poruka, dragocjenih iskustava i neprocjenjivih lekcija. To je putovanje imana i škola odgoja u kojoj vjernik se uči uzvišenim vrijednostima i plemenitim osobinama: ljubavi, bratstvu, altruizmu, služenju ljudima, savladavanju srdžbe, praštanju, darežljivosti, blagosti i skromnosti, te strpljenju pred neugodnostima.

Najveća korist koju vjernik nosi sa sobom iz ove veličanstvene ibadetske dužnosti jeste ostvarenje tevhida – čiste vjere u jednog Boga u njenom najuzvišenijem obliku i najpotpunijem značenju. To je potpuno predavanje Allahu kroz ibadet, pokornost Njemu kroz izvršavanje Njegovih naredbi i odricanje od širka i njegovih sljedbenika.

Zato je jedno od obilježja hadža – telbija: "Odazivam Ti se, Allahu, odazivam! Odazivam Ti se, Ti nemaš sudruga, odazivam Ti se! Tebi pripada svaka zahvala, blagodat i vlast. Ti nemaš sudruga!"

A najbolja dova dana Arefata jeste: "Nema boga osim Allaha Jedinog, Koji nema sudruga. Njemu pripada vlast i zahvala i On je svemoćan nad svim."

Pa, može li se nakon svega toga prihvatiti da se čovjek vrati svojim starim zabludama, pa da utočište traži na pragu turbeta ili kabura nekog evlije ili šejha, tražeći od njega ozdravljenje, potomstvo, pomoć i spas?! Zar da vlastitim rukama sruši ono što je sagradio i uništi ono što je uspostavio i učvrstio?!

Uzvišeni Allah kaže: "I ne budite kao onā koja bi svoju pređu rasprela kad bi je već bila čvrsto oprela." (En-Nahl, 92)

Jer, oni kojima se obraćaju ne mogu ni sebi ni drugima pribaviti korist niti od njih otkloniti štetu. Uzvišeni kaže: "Neki pored Njega božanstva prihvaćaju koja ništa ne stvaraju, a koja su sama stvorena, koja nisu u stanju od sebe neku štetu otkloniti ni sebi kakvu korist pribaviti i koja nemaju moći život oduzeti, život dati niti oživjeti." (El-Furkan, 3)





Štaviše, Allah je naredio Svome Poslaniku, sallallahu alejhi ve sellem, da ljudima kaže: "Reci: 'Ja ne mogu ni samome sebi neku korist pribaviti, ni od sebe kakvu štetu otkloniti; biva onako kako Allah hoće. A da znam pronicati u tajne, stekao bih mnoga dobra, a zlo bi bilo daleko od mene; ja samo donosim opomene i radosne vijesti ljudima koji vjeruju.'" (El-A'raf, 188)

Pa ko su onda evlije nakon Allahovog Poslanika, sallallahu alejhi ve sellem?!

Zato se bojte Allaha, cijenite ovu veliku blagodat i budite svjesni njene vrijednosti. Ustrajte na Pravom putu i nakon hadža, jer jedan od najočitijih znakova primljenog hadža jeste da se hadžija vrati s bogobojaznijim srcem i ljepšim odnosom prema ljudima.

Hodočasnici Allahove časne Kuće, od hadžskih obreda koji su preostali u ovim blagoslovljenim danima jeste bacanje kamenčića na tri džemreta. Ko požuri i danas obavi bacanje kamenčića te napusti Minu prije zalaska sunca, nema nikakvog grijeha. A onaj koga zalazak sunca zatekne na Mini, dužan je prenoćiti na Mini i noć trinaestog zul-hidžeta, te narednog dana, nakon što sunce prijeđe polovinu neba, baciti kamenčiće na sva tri džemreta.

Uzvišeni Allah kaže: "A ni onome ko požuri i ostane samo dva dana nije grijeh; a neće se ogriješiti ni onaj koji se dulje zadrži, samo ako se grijeha kloni. I bojte se Allaha i znajte da ćete svi biti pred Njim sakupljeni." (El-Bekara, 203)

Također, vrijeme za klanje hedja (hadžski kurban) i udhije (običnog kurban) traje do pred zalazak sunca trinaestog zul-hidžeta. Ko još nije prinio svoj hedj ili udhiju, neka požuri i ne odgađa.

Zatim, znajte da nijednom hadžiji nije dozvoljeno napustiti Meku, Allah je čuvao, prije nego što obavi oproštajni tavaf.

Ibn Abbas, radijallahu anhum, rekao je: "Ljudi su odlazili svako na svoju stranu, pa je Allahov Poslanik, sallallahu alejhi ve sellem, rekao: 'Neka niko ne napušta Meku dok mu zadnje djelo u Meki ne bude obilazak oko Allahove kuće (tavaf).'" (Muslim)





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

Zato donosite salavat i selam na najbolje Allahovo stvorenje, Muhammeda, sina Abdullahovog, jer vam je to naredio vaš Gospodar riječima: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljte mu pozdrav" (El-Ahzab, 56).

